

**Atuarfik pillugu Inatsisartut inatsisaat nr. 15, 3. december 2012-imeersumi § 25, imm. 4-imi aamma § 36, imm. 1-imi aalajangersarneqartut naapertorlugit meeqqanut inuusuttunullu inerikkiartornermikkut kingusissunut nerisaqarfigiutigalugu atuarfittut immikkut ilusiligaasumik sulii ataatsimik pilersitseqqullugit ingerlatseqqullugillu Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Agathe Fontain, Inuit Ataqtigiit)

**pillugu**

**Kultureqarnermut, Ilinniartitaanermut, Ilisimatusarnermut Ilageeqarnermullu  
Ataatsimiititaliap**

**ISUMALIUTISSIISSUTAA**

**Aalajangiiffigisassatut siunnersuutip aappassaaneerreqarnerani saqqummiunneqartoq**

Kultureqarnermut, Ilinniartitaanermut, Ilisimatusarnermut Ilageeqarnermullu  
Ataatsimiititaliaq kingullermik suliarinninnermini ukuninnga inuttaqarpoq:

Inatsisartunut ilaasortaq, Ruth Heilmann, siulittaasoq (S)

Inatsisartunut ilaasortaq, Per Berthelsen, siulittaasup tullia (S)

Inatsisartunut ilaasortaq, Mimi Karlsen (IA)

Inatsisartunut ilaasortaq, Harald Bianco (IA)

Inatsisartunut ilaasortaq, Randi Broberg (PI)

Siunnersuut UKA 13-mi ulloq 16. Oktober 2013 siullermeerneqareermat Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliamit misissorneqarpoq.

**Siunnersuutip imarisai siunertaalu**

Siunnersuutip siunertaani tunngavigineqarpoq meeqqat inuusuttullu immikkut pisariaqartitsisut atuartinneqarnissaannut neqeroorutinik amigaateqarneq.

Meeqqanut inuusuttunullu immikkut atuartinneqarnissamut pisariaqartitsisunut maannakkut neqeroorutaasut pioreersut, soorlu Ivaaraq Qaqortumi, Ado Lyngep Atuarfia, Aasiaat aamma Specialcenteri Ilulissaniittoq pisariaqartitsinermut annertusiartortumut naammaginnanngitsutut isigineqarput.

Siunnersuuteqartoq isumaqarpoq inuusuttut innarluutillit immikkut atuartinneqarnissamut pisariaqartitsisut ilinniaqqissinnaanermut ineriartoqqissinnaanermullu aamma piginnaasanik annertusaanissamut pitsaasumik atugassaqartinneqarlutillu sinaakkutissaqartinneqartariaqartut, minnerunngitsumik suliffinnut appakaatsinneqarnissaq eqqarsaatigalugu. Meeqqanut inuusuttunullu innarluutilinnut immikkut kostskoleliortoqarnissaanut siunnersuuteqartup tunngavigai Atuarfiit pillugit Inatsisartut Inatsisaat nr. 15. 2012-meersuni § 25 imm. 4 aamma § 36 imm. 1.

§ 25 imm. 4 imatut oqaasertaqartoq:

*Imm. 4. Atuarfinni najugaqarfiusuni immikkut aqqissuussani najugaqalersinneqarsinnaapput atuartut innarluutillit, atuaqqinnissaq/sungiusaqqinnissaq siunertaralugu angerlarsimaffiup avataaniinnissaq taakkununga annertuumik iluaqutaasussatut isigisariaqarpat.*

§ 36, imm. 1 imatut oqaasertaqartoq:

**§ 36.** *Naalackersuisut pisussaapput isumagissallugit:*

*1) § 25, imm. 4 naapertorlugu atuarfiit najugaqarfiusut immikkut aqqissuussat, ...”*

**Siunnersuutip Inatsisartuni siullermeerlugu suliarineqarnera****Naalackersuisut**

Naalackersuisut siunnersuut tapersinngilaat, aammalu siunnersuutip itigartinneqarnissaanut arlalinnik tunngavilersuillutik.

Siullertut Naalackersuisut meeqqat atuarfiani atuartut amerlassusaasa eqqortut kisitsisaannik saqqummiussipput, meeqqat atuarfianni tiiminut tamarmiusunut sanilliullugu annertusisamik immikkut atuartitsineq procentinngorlugu qaffariarnikuuvoq 2004/2005-imi 13 %-imiit

2011/2012-imi 15 %-imut, nalinginnaasumillu immikkut atuartitsineq procentinngorlugu 2004/2005-imi 5 %-imiit 2011/2012-imi 8 %-imut qaffariarnikuulluni, imatut paasillugu, ukiuni atuarfiusuni arfineq pingasuni 2%-miit 3%-mut immikkut atuartittariaqartut taakku marluk qaffassimapput. Meeqqat atuarfianni ilinniartitsisut ilinniartunik immikkut pisariaqartitsisunik atuartitsisartut perorsaanerme immikkut ilinniagaqarnikut ullumikkut amigaataasorujussuupput. Taamaalilluni ilinniartitsisut atuartunik immikkut pisariaqartitsisunik atuartitsisartut 230 missaaniittut taamaallaat 10 %-iisa missaat annertusisamik immikkut atuartitsinerme sammisumik ilinniagaqarput. Taamaammatt Naalakkersuisut isumaat malillugu pineqartup iluani ilinniagaqarnissamik ilinniagaqaqqinnissamillu suliniuteqarnissaq pisariaqartinneqartorujussuuvoq, taamaalilluni atuartut amerlanerusut naleqquttumik immikkullu piginnaasaqarfeqartunit atuartinneqartarniassammata isumagineqarlutillu.

Paasissutissat Naalakkersuisut pigisaat, siunnersuuteqartup eqqartugaanut siunertamut naleqqussinnaasut Ado Lyngip Atuarfianut utaqquisut pingasut saniatigut atuartut 14-nit maannakkut Danmarkimi paaqqinnittarfinni assigiinngitsuni inissineqarsimasut.

~~Tammaammatt Naalakkersuisut pissusissamisoortutut isigaat meeqqat tamarmik qanitaminni ilaqqatit qimannagit atuartinneqartarpat. Kiisalu Naalakkersuisut isumaqarput, meeqqat atuarfiat, tamanut, atuartut immikkut atuartinneqarnissaminut ineriartortinneqarnissaminnullu pisariaqartitallit ilanngullugit inissaqartinneqartariaqartut. Tassunga ilaliullugu Naalakkersuisut peqatigiiffiit suliniaqatigiiffiillu attuumassutillit immikkut ineriartornikkut innarluutilinnut angajoqqaajusut peqatigiiffiat "Inooqat" ilanngullugu qanimut inerisitaqarfiusumillu oqaloqatigiumavai pineqartumut naleqquttumik aaqqiissuteqarnissaq qulakkeerumallugu.~~

Naalakkersuisut isumaqarput taamatut erseqqissumik misissueqqissaartoqarsimatinnagu nerisaqarfutugalugu atuarfimmik immikkut aaqqissuussamik pilersitsinissaq – sullinniakkat amerlassusaat, pisariaqartitaat piginnaasallu ilisimanagit – eqqoriaanerinnakkut pisussaassaaq.

### **Siumut**

Inuusuttunut ilinniagaqarnissamut sulilernissamullu piareersarnissamut immikkut pisariaqartitsisunut ingerlariaqqiffissat amigaataasut Siumut isumaqarpoq. Ado Lyngip atuarfiani atuarernerme kingorna inuusuttut amerlasuut unittoortartut Siumut isumaqarpoq,

tassami kommunerisaaq imaluunniit illoqarfigisaaq najugaqarfigisarluunniit tapersersuineq ajormata imaluunniit iliuusissatut pilersaarusiornissamat neqerooruteqarneq ajormata.

Ilanngullugulu Siumut isumaqarpoq, nuna tamakkerlugu iliuusissatut pilersaarusiortoqartariaqartoq, naggataarutaasumik aalajangiisoqartinnagu peqataasut sullissisullu tamarmik innarluutillit atugarisaannik pisariaqartitaannillu naliliisinneqartassallutik.

### **Inuit Ataqtigiit**

Inuit Ataqtigiit siunnersuummut tapersiipput 2010-2012-mut atuartut aamma atuartut ingerlaqqinnngitsut pillugit Inerisaaviup allakkiornermini uppersarsarmagu 2011-mi

10. klassini atuartut 846-usimasut, immikkut atuartinneqartut ilanngullugit. Taakkunanga 45-it immikkut atuartuupput, misilitsinnernulli pisussaatinneqarnatik. Taakku klassit 2-3-it nalingaat.

Inuit Ataqtigiit isumaqarput atuartut amerlassusaasa 45-nerat erngumanartuusoq, tamannalu tunngavigisariaqaripput pisariaqartumillu aalajangiussaqaarluta.

Ilanngullugulu Inuit Ataqtigiit isumaqarput Ado Lyngip aturfiani illutaqarnikkut ilinniarsimassutikkullu piginnaasatigut atuartunik inersimasunngornissamat taamaalillutillu inuiaqtigiinni inuttaasut nalinginnaasut assigalugit imminnut pilersorsinnaanermut ilinniartinneqartussanik amerlanerusunik tigusinissaminut naammangitsoq.

### **Atassut**

Atassutip siunnersuut isumaqtigaa, meeqqat inuusuttullu immikkut ilinniartinneqarnissamat pisariaqartitsisut pissarsiaqaataasumik atuartinneqarnissamat ingerlaqqiffiusumillu ilinniaqqinnissamat kivinneqarnissamat ineriartortinneqarnissamullu pisariaqartitsineri tunngavigalugit.

### **Partii Inuit**

Partii Inuit meeqqanut inuusuttunullu sapinngisamik pitsaanerpaamik atugaqartitserusupput, kisiannili siunnersuut tapersernagu. Illuatungaatigut Naalakkersuisut pilersaarutaannik ingerlasunik partii tapersiivoq. Ilanngullugulu Partii Inuit isumaqarpoq meeqqat aturfiani aaqqissuussaasumik atuartitsinerit nukittorsarneqartariaqartut naleqqussarneqarlutillu, naalakkersuisullu pilersaarutaat ingerlasut innersuussutigalugit, ajornartorsiutip pineqartup ilinniartitaanermut pilersaarutinut ilanngunneqarnissaa.

**Siunnersuummik ataatsimiititaliap suliaqarnera:**

Ataatsimiititaliap siunnersuutip aappasaanneerseqarnissaa UPA14-mut kinguartippaa, taamaalilluni ataatsimiititaliaq siunnersuummik suliaqarnermut atatillugu susassaqtunik suliffeqarfinnillu tamanik akuliutsitsinniassagami.

Ilaqutariinnermut Inatsiseqarnermullu Naalakkersuisup aamma meeqqat innarluutillit angajoqqaavisa peqatigiiffiata “Inooqat”-ip isumasioqatigiissitsinermik aaqqissuussaanut ataatsimiititaliaq aallartitaqarpoq ulloq 26. Marts 2014 ingerlanneqartumut. Qulequtarineqarpoq: Ullumikkut Kalaallit Nunaanni ineriartornermikkut kingusissut – unammilligassat periarfissallu.

Isumasioqatigiinnermi ilisimatitsissutigineqarpoq, Inooqat kommuninut, illoqarfinnut kiisalu nunaqarfinnut arlalinnut meeqqat inuusuttullu innarluutillit angajoqqaavi pillugit paasisutissanik katersilluni angalasimasoq, tassungalu atatillugu ikiorserneqarnissaq tapersersorneqarnissarlu siunertaralugit inatsisitigut pisinnaatitaaffiit paasisutissiissutigineqarlutik.

Kiisalu angajoqqaat kommuninit assigiinngitsuneersut innarluutilinnik meerallit arlalinnik saqqummiussaqrput, assersuutigalugu ADHD-mik aamma autisme-mik nalilerneqartut pillugit, aammalu oqaatigalugit kommunini namminneq misigisartakkatik. Saqqummiussisut tamarmik oqaatigaat pisortanut saaffiginninnermi kipiluttunartumik naapittakkatik, tassami innarluutilimmut qanigisaasutut saffiginninneri pisortat suliffeqarfiini tamatigut ajornartorsiutaasut aaqinneqarnissaannut sakkussaqrneq ajormata. Kommunit illoqarfittaat nunaqarfittaallu tamarmik inatsisit tunngavigalugit pisussaaffiusunik tapersersuinissamut ikiorserneqarnissamullu periarfissaqrneq ajorput nukissallu pisariaqartinneqartut amigaatigisarlugit. Ajornartorsiut alla ersarisoq tassaavoq inuusuttut 15-niit 21-nut ukiullit inuiaqatigiinnut akuliutinissaannut imaluunniit ilinniaqqinnissaannut sullissiveqanngimmat. Tamanna ajornartorsiutinngortarpoq, angajoqqaat qanigisaasullu piffissarujussuaq nukippassuillu nunatsinni nunanilu allani periarfissanik ujaasileraangata. Tassungali atatillugu oqaatigisariaqarpoq, kommunit arlallit ajornartorsiut eqqumaffigimmassuk, taamaalillutillu meeqqanut inuusuttunullu ilaqutaasunut inatsisit tunngavigalugit ikiorserneqarnissamut

siunnersorneqarnissamullu pisinnaatitaaffilinnut ikiorsiineq pisariaqartoq aallartissimammassuk.

### **Sassartitsinerit**

Meeqqanut inuusuttunullu innarluutilinnut peqatigiiffik "Inooqat" aamma innarluutilinnut ilisimasani katersuiffiullunilu siunnersuisarfik IPIS, ilaqtariinnermut inatsiseqarnermullu qullersaqarfiup ataani inissinneqarsimasoq, ulloq 2. Maj 2014 sassartinneqarnissamut ataatsimiititaliamit aggersarneqarsimapput, sassartinneqartunullu ataasiakkaarlutik nalunaaquttap akunnerata affaa saqqummiinissamut piffissaliunneqarluni.

Taakua sassartinneqarneranni pineqarluni innarluutilinnut suliani killiffik, imatut paasillugu, pilersaarutit ingerlasut, siunissamut pilersaarutit takorluukkallu.

### **Inooqat**

Inooqat siunnersuummi toqqaannartumik tunngavilersorsimapput, makkualu tunngavigalugit siunnersuummut tapersiinani:

- 1) Sullisseriaaneq pioreersoq unammillerneqassanngitsoq, suliamut attuumassuteqanngitsumik Namminersorlutik Oqartussat kommunillu innarluutilinnut immikkoortumi sullissineranut nakkutilliisussamik amigaateqartoqarpoq. Ataatsimit isigalugu ajornartorsiutip qanoq annertutigineranik suliassallu qanoq aaqqiiffigineqarsinnaaneranik tikkuussisinnaasumik misissuinissaq amigaatigineqarpoq.
- 2) Pisariaqartitsineq tunngavigalugu sullissineri piginnaasat qaffanneqassapput, akulikitsunik pisartutut kommunit nunattalu karsiata qanoq imaqartiginerat eqqarsaatiginagu.
- 3) Sulianut ilisimasallit innarluutilinnut tunngasuni kommunini nunalu tamakkerlugu qanoq ingerlatsivigineqarnissaannik ataatsimoorussamillu naliliisinnaasut amigaatigineqarput. Paaqqinnittarfinnut nunatsinni Danmarkimiluunniit inissiinermi tamatigut pineqartup sumut inissinneqarnissaanut tunngatillugu innarluutillit ataasiakkaat pisariaqartitaat ilanngunneqarnej ajorput.

### **IPIS**

IPIS ilisimasani katersuiffiuvoq siunnersuisarfiullunilu siunertaralugit atuisunik, innarluutilinnut qanigisaasunut, sullissisunut, atuisutullu paaqqinnittarfinnut

siunnerfilimmik siunnersuinissaq, siunnersuineq kalaallisut ingerlanneqartarluni Kalaallit Nunaannilu pissutsinut naleqqussarneqarsimalluni. Taassuma saniatigut IPIS ilisimasaniq paasissutissanillu katersuiffiuvoq suliaassaralugu innarluutillit pillugit paasissutissat katersorneqarnissaat tamanit atorneqarsinnaasunngorlugit, nittartagaq ingerlaavartumik nutarterneqartarpoq. IPIS cd-mik innarluutillit pillugit immikkut paasissutissaniq imaqartunik tamanit atorneqarsinnaasumik saqqummiussisimavoq.

IPIS 2009-ip naanerani aallartisarneqarpoq kisiannili 2011-mi innarluutilinnut immikkoortup kommunitut nuunneqarnerata kingunitsianngua aallartilluarluni. IPIS Ilaqutariinnermut inatsiseqarnermullu qullersaqarfiup ataaniippoq, kisiannili immikkut suliffeqarfiulluni. IPIS innarluutit assigiinngitsut pillugit paasissutissaniq quppersagaliortarnerup saniatigut sulianik assiginngitsunik tiguisarpoq.

Takkua saniatigut nuna tamakkerlugu sulisunik pikkorissaanernik aqqissuussisarpoq. Annertunerusumik modulikkartumik pikkorissaasarnert saniatigut tapersersortit ilinniarsimangitsut assigisaallu, kommunit isumasiorlugit ingerlanneqartartut. Ilangullugulu qanigisaasunut pikkorissaanert ingerlanneqartarput, soorlu assersuutigalugu tusilartunut oqajuitsunullu ilaqutaasunut. Kiisalu IPIS peqatigalugu innarluutillit atugarisaat pillugit nuna tamakkerlugu ataatsimeersuartoqartarpoq isumasioqatigiittoqartarlunilu nassuiaatinik saqqummiussinernik kinguneqartinneqartartunik.

Innarluutit ataasiakkat pillugit nunamit tamarmit katersuutsitsisoqartarpoq, siunertarineqarluni peqatigiiffiit aallartisarneqarnissaat aallartinneqarnissaallu. IPIS-ip pissutsit paasinissaat anguniarlugu naqinnernik ilisarinnissinnaanngitsut assigisaasalu katerisimaartinneqarnissaat suliaralugu aallartissimavaa, Kalaallimmi Nunaanni naqinnernik ilisarinnissinnaanngitsut qassiorpiarnerinik kisitsisit pigineqanngimmata. Kiisalu piffissami matumani Kalaallinut atuisunut misissuuttissamik tulluarsakkamik suli peqanngilaq tamatumalu nassatarisaanik naqinnermik ilisarinnissinnaanngitsut nassaariniarneri naatsornerinillu suli pigineqartoqarani.

IPIS isumaqarpoq, innarluutilinnut immikkoortup tamakkerlugu qulaajarneqarnissaanut immikkoortunut aalajangersimasunut ataasiakkaanut ilinniagallit suli amigaatigineqartut.

**Ataatsimiititaliap oqaaseqaatai ataatsimoortillugit**

Siunnersuuteqartup siunnersuummi siunertarisaanut taasissutigineqartussamut siullermik ataatsimiititaliaq naliliissaaq.

Siullertut siunnersuuteqartup tungavilersuutigaa, inatsisartut atuarfiit pillugit inatsisaat tungavigalugu, periarfissaqartitsimmat immikkut ilusilimmik atuartunik innarluutilinnik tiguisinnaasumik kostskoliliortoqarsinnaanera. Kostskole atuartunut atuarnerup ingerlateqqinneranut imaluunniit sungiusarnermut atatillugu angerlarsimaffiup avataaniinnissamut naleqquttunut immikkut naleqqussarneqarsimassaaq.

Aappassaannik ataatsimiititaliap ajornartorsiutip annertuneranik aammalu inuiaqatigiinni aaqqiinernik massakkut pisariaqartitsisoqarneranik siunnersuuteqartoq isumaqatigaa. Ataatsimiititaliap aammalu Inatsisartuni ataatsimiititaliat allat ajornartorsiut qanimut ilisimaaraat, ukiunilu kingullerni innarluutilinni atugarisat pillugit isumaliutissiissutinik arlalinnik suliaqartarsimallutik. Tamatumunnga atasumik ajornartorsiut suliariniarlugu aamma arlaleriarluni ataatsimeersuarnerit, ataatsimiinnerit pikkorissarnerillu kommunikkaarlugit aamma nuna tamakkerlugu pisarsimapput. Ukiuni kingullerni aaatsimiititaliaq paasissutissanik suliaqarlunilu pissarsisarsimavoq. Tamanna pisarpoq, ataatsimiititaliap angalanerisigut, Naalakkersuisunik apersuinikkut, sassartitsinikkut aammalu suliamut attuumassuteqartunik ataatsimeeqateqarnikkut, minnerunngitsumillu ataatsimiititaliap suliffeqarfinnut susassaqaarfiisa ataani inissisimasunut paasisassarsiorluni pulaatarnerni.

Ataatsimiititaliamit ilisimaarineqarpoq nunatta isorartunerujussuata aammalu innarluutilinnut sullissinermi immikkoortotami sullissisunik ilsimasaqarnikkut amigaateqarneq ajornartorsiutinik nutaanik pilersitsisartoq. Ilanngullugulu ataatsimiititaliamit ilisimaneqarpoq inuiaqatigiinni paasissutissanik saqqummiussisarneq annertusiartortillugu sukkanerujartortillugulu innarluutilinnut immikkoortotami suliniutissatut piumasaqaatit annertusiartortut.

Naak siunnersuuteqartoq tungaviatigut ataatsimiititaliap atuartunut ukiui naleqquttunut, taakku 15-leereersimassallutik, immikkut pisariaqartitsisunut kostskolemik nutaanik pilersitsisoqarnissaa isumaqatigigaluarlugu, ataatsimiititaliaq allannguutissatut siunnersuummik saqqummiussaqaassaaq, tassuuna aalajangersimasumik siunnerfilimmik pitsaanerusumik aalajangiisoqarnissaa tungavigalugu.



**Allannguutissatut siunnersuummut pissutaasoq**

Innarluutilinnut kostskole Ado Lyngip atuarfia maannakkut pigineqartoq Aasianni inissisimasoq pisoqaasoq kiisalu tamakkiisumik iluarsaanneqanngikkuni nutaanik illutalernerqartariaqartoq ataatsimiititaliamit ilisimaneqarpoq.

Pineqartumi ataatsimiititaliamit innersuussutigineqassaaq, nutaamik kostskoliortoqassappat, meeqqat atuarfianut ilassutaanissaa avatangiisillu qaninnerusut eqqarsaatigilluarneqarnissaat – imatut paasillugu – illutat tassungalu atatillugu atortulersuutit innarluutinut assigiinngitsunut naapertuuttunngorsarneqartariaqarlutik.

Ataatsimiititaliamit ilisimaneqarpoq, Kalaallit Nunaat ataatsimut isigalugu misissuisoqarnisaanik pisariaqartitsisoqartoq suliaqarfiit arlallit tikkuarmassuk, annertunerusumik ukioqatigiiaanut siunnersuuteqartup pisaanut tunngatillugu, tassa 15-niit qummut ukiulinnut.

Taamaattumik ataatsimiititaliaq isumaqarpoq, sullissisunut tamanut pingaaruteqartoq siunissami kostskoli innarluutilinnut neqeroorutaasinnaasoq nutaaliaasorlu qanoq iluaqutigineqarsinnaaneraniq misissuineramik pilersitsisoqarnissaa sullissisunik tamanik peqataaffigineqartumik. Kiisalu ataatsimiititaliamit eqqumaffigineqarpoq, innarluutilinnut immikkoortuni pisinnaasatigut ilisimasatigullu pisinnaasat sulisunut assigiimmik piumasaaqaataanissaat, taamaattumilli piginnaanngorsarluni pikkorissarnerit aallaqqaataaniit piumasaneqassasut. Kostskolimik siunertap tunngavigissavaa, ilinniartitsinerit nutaajusut ilaatinneqarnissaat atuartut inuiaqatigiinni avatangiiserisaminni nalinginnaasumik inuuneqalernissamat piareersarnissaat sungiusarnissaallu eqqarsaatigalugu, tassa, ilinniagaqarnissamat inuussutissarsiutinillu ingerlatsinissamat, tassaammata inersimasutut inuunermi ingerlatsinissamat tunngavileeqataasumik ilinniarluni aallartitsisinnaanerit imaluunniit suliffimmik tiguisinnaanerit. Ataatsimiititaliamit siunnersuuteqartup anguniagai isumaqatigineqarput, inuusuttut immikkut atuartinneqarnissamat pisariaqartitsisut pitsaasunik sinaakkutissaqartinneqarnissaat aamma pissutsit atuartitsinnermi, ineriartortitsinnermi piginnaanngorsaqqinnermilu eqqarsaatigineqassasut, minnerunngitsumillu inuussutissarsiornermut isersinnaanermut periarfissat eqqarsaatigalugit.

Innarluutilinnut immikkoortumi sulisoqarniarnerup tungaatigut ajornartorsiutit ataatsimiititaliamit ilsimaarineqarput, tamatumunngalu atatillugu siunnersuut UPA14/111 ulloq 7. Maj akuersissutigineqartoq innersuussutigissallugu: Nunatsinni innarluutilinnik

sullissisuusut ilinniagaqarnissamut piginnaangorsarnissamullu pisariaqartitaat aallaavigalugit Naalackersuisut iliuusissamik suliassamullu piareersaasiamik innarluutilinnik sullissinermi piginnaangorsarnissamut pisariaqartitat tamakkiisumik pigilernissaannut tikkuussisunik UPA 2015-mut saqqummiusseqqullugit peqquneqarnissaannik Inatsisartut aalajangiiffigisassaattut siunnersuut.

Pissutissatut saqqummiunneqartut tungavigalugit matumuuna ataatsimiititaliaq allannguutissatut siunnersuuteqassaaq:

Meeqqat atuarfianut atatillugu Innarluutillit pisariaqartitaat aallaavigalugit ilanngutsitsilluni atuartitsinermik immikkut aaqquissuussinissamik misissuineramik saqqummiussinissamut, taassuma ataani Kalaallit Nunaanni meeqqanut inuussuttunullu ineriartornermikkut innarluutilinnut immikkut aaqquissuusamik kostskole-liortoqarnissaanik imaluunniit iluarsaassinissamut misissuititsinissamik Naalackersuisut peqquneqarnissaannik Inatsisartut aalajangiiffigisassaattut siunnersuut. Misissuinerit kingusinnerpaamik UPA/15-mi malitsitut iliuusissat pillugit inassuteqaatitalerlugit saqqummiunneqassapput kiisalu nunatsinni efterskolini pineqartuni immikkut atuartuartsinerup pilersinneqarnissaanik pisariaqartitsinermik misissueqqissaarneq.

**Ataatsimiititaliap allannguutissatut siunnersuutaanut aningaasatigut allaffissornikkullu kingunissaritinneqartut:**

Ataatsimiititaliamit nalilerneqarpoq, misissuinissamut kissaatigineqartut aningaasatigut kingunissai AC-fuldmægtigep qaammatip pingasut sulisinneqarneratut naleqarnissaat, tamannalu 125.000 kr. Missaanni naleqarpoq.

Tamatumunnga ilanngunneqassapput nutserinermut aningaasartuutit kiisalu naqiterinermut siaruarterinermullu aningaasartuutissat. Ataatsimut katillugit aningaasat 200.000 kr. tungaanut atorineqarnissaat naatsorsuutigineqarpoq. Naalackersuisoqarfiup pineqartup aningaasartuutissaani pioreersuni aningaasartuutissat ingerlanneqarsinnaasutut isigineqarpoq, tassami innarluutilinnut immikkoortortap kommuninut suliassanngortinneqarnissaanut nalilersuinerit ingerlanneqareermata.

**Inassuteqaat:**

Siuliani oqaatigineqartut siunnersuummillu siullermeerinermi oqaaserineqartut tunngavigalugit allannguutissatut siunnersuut akuerineqassasoq ataatsimiititaliamit isumaqatigiittumit inassutigineqarpoq, aallaqqaammullu siunnersuutip itigarneqarnissaa inassutigineqarluni.

**Inassutigineqassaaq:**


Taamatut oqaaseqarluni ataatsimiititaliap siunnersuut naggataarutaasumik aappassaaniigassanngortippaa.



Ruth Heilmann



Per Berthelsen



Mimi Karlsen



Harald Bianco



Randi Broberg